

A Barcelona ence na delegazion fascèna

L goern catalan à aproà la lege de politica linguistica per la Val d'Aran



Cristina Donei, I dirigent del Servije per la mendranzes linguistics de la Pat Marco Viola e I Sindic Francesc Boya.



La Procuradora Donei con l'onorevole Maria Àngels Cabasés.

A che servel l bilinguism talian-ladin ti ac ofiziai del Comun General de Fascia se dapò à valuta giuridica demò l scrit per talian? No risiela la traduzion ladina de esser demò n esercizie academich, ence smers, sorafora l valor e l'emportanza, tant per l prestije del lengaz che per la comunanza, de poder aer tedant ence l test tel lengaz de mendranza? L'é chisc i dubies e la domanes che l'à uzà fora la Procuradora del Comun General de Fascia Cristina Donei tel cors de la scontrèda col Sindic del Conselh Generau de Aran Francesc Boya, stata a Barcelona en mèrcol ai 22 de setembar.

Da egn fascegn e araneisc é leé da relaziuns de fradaa che se poja sun gran valivanzes anter i doi teritories: la dimenjion orografica e demografica, l svilup turistic, l chèder istituzionèl, l'esser comunanzes de mendranza linguistica delaite de na realtà de autonomia regionèla respetousa di deric linguistics di sentadins; valores che deida la val de Fascia e la val d'Aran a trèr gregh vantajes da la cognoszenza e la colaborazion.

Per chest la Procuradora de Fascia l'à volù ge testimonièr al colega araneis l'amicizia e la partezipazion di fascegn tel di canche l Parlament Catalan à aproà con na maoranza neta (117

a 17) la lege de sconanza del lengaz araneis, ofizial te la Val d'Aran e te la Catalunya. L'é la pruma norma de politica linguistica aproèda a Barcelona dò la sentenza de la Cort Costituzionèla spagnola che aea lascià destrametui ajache l'aea anulà bona pèrt del nef statut de autonomia catalana e l'era per chest gran curiosità per cognoscer la posizion di parlamentères catalans. L'éjit de la litazion, che à soscedà n lonch batiman ai raprezentanc araneisc tel Parlament, à sottrissà amò n'outa l destach da Madrid e l gran respet de chesta tera per i lengac de mendranza.

L recognosciment de l'ozitan araneis l'é gran e fort: l'é l lengaz prioritèr, "normal", de l'amministrazioni publiche, di mesi de comunicazion, de la scola e de la toponomastica. E i ac giuridics per araneis à "duta la legitimità e l'efizienz, senza pregiudizies de deric recognosciui ai sentadins, a confront di etres lengac ofiziai" (che l'é l spagnol e l catalan). I sentadins à donca l derit – descheche l'é ence chiò te Fascia – de l cognoscer e de l durèr te ogne ocasion zenza per chest esser oget de discriminazion, co la soula desferenza che aló l'araneis l'à valor giuridich.

N aspet enteressant per i ladins l'é che la neva norma conscidra

dut l teritorie ozitan che va da la Spagna a la Tèlia desche na unità linguistica delaite de l'Europa e oblighea la istituzioni catalanes e araneises a colaborèr con cheles di etres teritories de lengaz ozitan a favor de chesta unità.

La Procuradora Cristina Donei ge à sport la congratulaziuns al colega Procurador del Conselh Generau de Aran Francesc Boya Alos, che l'é ence comember del Parlament catalan, a la reladora del dessegn de lege onorevole Maria Àngels Cabasés del partit Esquerra Republicana de Catalunya e al Diretor de l'Istitut de studies araneisc Jep de Montoya, e l'à dapò rejonà coi responsàboi de l'operazion politica Bernat Joan, secretèr de politica linguistica de la Generalitat e Jusèp Lois Sans, diretor de l'ofize enciarià per l'ofizialità de l'araneis te la Catalunya.

De firé, la vijita te val de Fascia de na delegazion de la Val d'Aran con a cef l Sindic Boya, consentirà de programèr tel concret na lingia de scomenzadives de baratò e fradaa, per renforzèr l leam jà envià via ti setores de la formazion, de la cultura e del svilup economich, e la didarà a smaorèr la convinzion de n nef travert per la comunanza ladina: la legitimità giuridica del lengaz ladin ti ac publics e privac.